

Utusan Malaysia Oktober 2018

Bil.	Tarikh	Tajuk Berita	Catatan	Muka Surat
1.	4 Oktober 2018	Polis jangka panggil Rosmah	Suruhanjaya Pencegahan Rasuah Malaysia (SPRM)	3
2.	5 Oktober 2018	NFDP perlu-bebas-penyelewangan-rasuah	Suruhanjaya Pencegahan Rasuah Malaysia (SPRM)	5
3.	9 Oktober 2018	DBKL peroleh RM149 juta hasil rundingan transaksi penjualan tanah	Suruhanjaya Pencegahan Rasuah Malaysia (SPRM)	7
4.	10 Oktober 2018	Bekas penolong jurutera didakwa terima rasuah RM4,200	Suruhanjaya Pencegahan Rasuah Malaysia (SPRM)	9
5.	10 Oktober 2018	Gudang kepak ayam haram : 50 peratus siasatan selesai - SPRM	Suruhanjaya Pencegahan Rasuah Malaysia (SPRM)	11
6.	10 Oktober 2018	Rasuah: Jurubahasa Vietnam ditahan	Suruhanjaya Pencegahan Rasuah Malaysia (SPRM)	12
7.	11 Oktober 2018	Bekas pengurus didakwa pecah amanah baja subsidi	Suruhanjaya Pencegahan Rasuah Malaysia (SPRM)	14
8.	12 Oktober 2018	Ahmad Zahid beri keterangan SPRM kali ke-5	Suruhanjaya Pencegahan Rasuah Malaysia (SPRM)	16
9.	13 Oktober 2018	Ahmad Zahid perjelas tujuh perkara Sedia ke SPRM lagi sekiranya maklumat tidak mencukupi	Suruhanjaya Pencegahan Rasuah Malaysia (SPRM)	17
10.	14 Oktober 2018	Rasuah: Inspektor wanita pula ditahan	Suruhanjaya Pencegahan Rasuah Malaysia (SPRM)	19
11.	17 Oktober 2018	IPIC: Najib sekali lagi ke SPRM	Suruhanjaya Pencegahan Rasuah Malaysia (SPRM)	20
12.	17 Oktober 2018	Faedah 1MDB yang perlu dibayar	1Malaysia Development Berhad (1MDB)	21
13.	21 Oktober 2018	Kakitangan Jabatan Perhutanan mengaku tidak bersalah	Suruhanjaya Pencegahan Rasuah Malaysia (SPRM)	22
14.	22 Oktober 2018	SPRM tahan 15 pegawai belia sukan	Suruhanjaya Pencegahan Rasuah Malaysia (SPRM)	23
15.	22 Oktober 2018	SPRM tidak berkompromi pihak terlibat rasuah dalam pencerobohan Cameron Highlands	Suruhanjaya Pencegahan Rasuah Malaysia (SPRM)	24
16.	23 Oktober 2018	Ahli Majlis Daerah antara ditahan SPRM	Suruhanjaya Pencegahan Rasuah Malaysia (SPRM)	26
17.	23 Oktober	12 pegawai belia dan sukan direman 5	Suruhanjaya Pencegahan	28

Bil.	Tarikh	Tajuk Berita	Catatan	Muka Surat
	2018	hari	Rasuah Malaysia (SPRM)	
18.	23 Oktober 2018	Najib dipanggil semula, Irwan Siregar mungkin ditahan esok	Bekas Perdana Menteri, Datuk Seri Najib Razak	29
19.	29 Oktober 2018	SPRM tahan pengarah IPTA	Suruhanjaya Pencegahan Rasuah Malaysia (SPRM)	30
20.	29 Oktober 2018	Pengarah jabatan IPTA ditahan SPRM kes rasuah lebih RM159,000	Suruhanjaya Pencegahan Rasuah Malaysia (SPRM)	31
21.	30 Oktober 2018	Pegawai imigresen didakwa rasuah	Suruhanjaya Pencegahan Rasuah Malaysia (SPRM)	32
22.	30 Oktober 2018	Didakwa salah guna kuasa	Suruhanjaya Pencegahan Rasuah Malaysia (SPRM)	34
23.	30 Oktober 2018	Itu bukan masa saya - hasan	1Malaysia Development Berhad (1MDB)	36
24.	30 Oktober 2018	SPRM perlu siasat dakwaan MyPPP terima RM36 juta wang 1MDB	1Malaysia Development Berhad (1MDB)	38

1. Polis jangka panggil Rosmah**Tan Sri Mohamad Fuzi Harun**

PUTRAJAYA 4 Okt. - Polis tidak menolak kemungkinan untuk memanggil isteri bekas Perdana Menteri, Datin Seri Rosmah Mansor bagi memberi keterangan terhadap pelbagai kes termasuk membabitkan 1Malaysia Development Berhad (1MDB).

Ketua Polis Negara, Tan Sri Mohamad Fuzi Harun berkata, pihaknya memerlukan maklumat daripada isteri bekas Perdana Menteri itu selepas beliau memberikan keterangan kepada Suruhanjaya Pencegahan Rasuah Malaysia (SPRM), semalam.

"Ada kemungkinan untuk memanggil beliau bagi membantu siasatan terhadap pelbagai isu termasuk berkaitan 1MDB," katanya kepada pemberita selepas menghadiri Program Lawatan Hospital sempena Peringatan Hari Polis Ke-211 di Hospital Putrajaya di sini hari ini.

Beliau berkata demikian sebagai mengulas penahanan Rosmah berhubung siasatan pengubahan wang haram oleh SPRM semalam.

Rosmah yang kemudiannya dibawa ke Mahkamah Sesyen Kuala Lumpur hari ini akan menghadapi pertuduhan di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLATFPUAA) 2001.

Dalam pada itu, Mohamad Fuzi turut mengesahkan bahawa notis merah oleh polis antarabangsa (Interpol) terhadap ahli perniagaan, Low Taek Jho telah disiarkan semalam.

"Bukan saja dia tetapi nama bapa dia (Tan Sri Low Hock Peng) juga disiarkan," katanya.

Sementara itu, ditanya mengenai perkembangan terkini berkenaan siasatan terhadap bekas Ketua Pegawai Eksekutif 1MDB, Arul Kanda Kandasamy, Mohamad Fuzi berkata, kertas siasatan itu telah siap dan akan dihantar kepada timbalan pendakwa raya.

5 Oktober 2018

2. NFDP perlu bebas penyelewangan, rasuah

SYED SADDIQ SYED ABDUL RAHMAN (tengah) ketika hadir dalam perjumpaan bersama kakitangan dan jurulatih NFDP di Majlis Sukan Negara, Bukit Jalil semalam.

KUALA LUMPUR 5 Okt. - Kementerian Belia dan Sukan (KBS) bersedia untuk melaporkan kepada Suruhanjaya Pencegahan Rasuah Malaysia (SPRM) jika mendapat berlaku penyelewengan dan rasuah dalam pelaksanaan Program Pembangunan Bola Sepak Negara (NFDP).

Menteri Belia dan Sukan, Syed Saddiq Syed Abdul Rahman berkata, beliau memandang serius perkara tersebut selepas terdapat dakwaan wujudnya unsur ketirisan melibatkan kontraktor yang dilantik secara terus untuk membangunkan Akademi Mokhtar Dahari (AMD) di Gambang, Pahang, yang merupakan akademi pusat NFDP, melibatkan kos RM85 juta.

"Saya sendiri akan menilai dan melihat, jika perlu pengauditan kita kena buat dan kalau perlu siasatan kita akan maklumkan kepada SPM."

"Saya agak serius dalam perkara ini kerana apabila saya bertemu (Pengarah NFDP) Lim Teong Kim, barisan kejurulatihan dan sekarang di sini, semua orang cakap perkara yang sama."

"Apabila kita sedang sibuk membincangkan isu-isu yang besar, perkara asas seperti bola pun tidak mencukupi."

"AMD sepatutnya menjadi pusat kecemerlangan yang setaraf dengan akademi Bayern Munich, Jepun dan Korea Selatan. Namun disebabkan perkara-perkara sebegini wujud banyak kelemahan," katanya kepada pemberita selepas sesi Townhall NFDP di Majlis Sukan Negara, Bukit Jalil, di sini malam tadi.

9 Oktober 2018

3. DBKL peroleh RM149 juta hasil rundingan transaksi penjualan tanah



KHALID ABDUL SAMAD bercakap pada sidang media sempena rundingan transaksi penjualan tanah DBKL di Menara DBKL, Jalan Raja Laut di sini, hari ini. UTUSAN/AZLAN HADI ABU BAKAR

KUALA LUMPUR 9 Okt. - Sebanyak RM 149 juta berjaya diperoleh Dewan Bandaraya Kuala Lumpur (DBKL) hasil rundingan bersama 16 daripada 23 transaksi penjualan tanah hak milik pihak berkuasa tempatan itu.

Menteri Wilayah, Khalid Abd. Samad berkata, bagaimanapun tujuh transaksi masih belum dimuktamadkan yang mana ia melibatkan tiga tanah memerlukan penilaian semula, tiga tidak mencapai kata sepakat dan satu dibawa ke mahkamah.

Beliau berkata, rundingan transaksi itu perlu dilakukan semula ekoran tindakan kerajaan terdahulu yang menawarkan harga tanah lebih rendah daripada pasaran sehingga merugikan DBKL.

"Sebanyak 23 transaksi tanah yang dirunding semula itu melibatkan keluasan keseluruhan 256.96 ekar di sembilan Parlimen Wilayah Persekutuan Kuala Lumpur antaranya Bandar Tun Razak, Segambut, Kepong, Seputeh dan Titiwangsa.

"Rundingan itu juga berjaya memperoleh sumbangan tanggungjawab sosial korporat sebanyak RM6 juta kepada kerajaan," katanya dalam sidang akhbar jawatankuasa khas rundingan 97 transaksi tanah DBKL di sini, hari ini.

Terdahulu, siasatan dijalankan ke atas 97 transaksi membabitkan penjualan tanah milik DBKL bernilai RM5.63 bilion dan sebanyak 23 transaksi berjaya dirunding, 10 transaksi dibatalkan, satu transaksi dibawa ke mahkamah manakala 43 transaksi tanah diteruskan.

Dalam pada itu katanya, sebanyak 20 transaksi tanah yang selesai dipindah milik kepada syarikat pembeli akan diserahkan kepada Suruhanjaya Pencegahan Rasuah Malaysia (SPRM) untuk siasatan lanjut.

Dalam perkembangan lain, Khalid memberitahu, setakat ini pihaknya tidak menerima sebarang permohonan permit untuk menganjurkan pesta arak 'OktoberFest' yang dijangka diadakan pada Khamis ini di sebuah pusat membeli-belah di Lembah Klang.

"Sekiranya pengajur masih mahu menganjurkan Oktoberfest mereka mesti memohon permit daripada DBKL serta mematuhi syarat-syarat yang ditetapkan antaranya tidak membenarkan orang Islam menyertainya.

"Kami akan menyiasat terlebih dahulu siapa pengajurnya dan akan berjumpa mereka untuk berbincang," katanya.

10 Oktober 2018

4. Bekas penolong jurutera didakwa menerima rasuah RM4,200

HAIRUDIN NGADIRON didakwa menerima rasuah RM4,200 di Mahkamah Sesyen Johor Bahru, hari ini.

JOHOR BAHRU 10 Okt. - Bekas Penolong Jurutera Jabatan Kerja Raya (JKR) negeri dihadapkan ke Mahkamah Sesyen di sini hari ini atas tuduhan menerima suapan berjumlah RM4,200 berhubung pembayaran membaiki sebuah kenderaan, tahun lalu.

Tertuduh, Hairudin Ngadiron, 43, mengaku tidak bersalah bagi pertuduhan utama dan pilihan selepas kedua-duanya dibacakan di hadapan Hakim, Kamarudin Kamsun.

Berdasarkan kertas pertuduhan, dia yang bertugas di Maktab Teknik Polis Diraja Malaysia (PDRM), Bakri, Muar, didakwa menerima suapan RM4,200 iaitu bayaran membaiki kenderaan di bengkel dekat Jalan Dato' Haji Kosai, Parit Keroma, Muar pada 15 Mac 2017.

Suapan itu bagi dirinya sebagai upah membantu mendapatkan kerja di maktab berkenaan pada 2016, iaitu pembaikan bangunan dan pagar keselamatan di pondok pengawal maktab, kerja pembaikan lapang sasar semi 'indoor' 25 meter serta perkhidmatan operasi dan penyelenggaraan kolam renang di kompleks sukan maktab terbabit.

Bagi pertuduhan pilihan yang ditawarkan, tertuduh pada hari dan di tempat sama, didakwa menerima suapan itu daripada individu yang sama dengan tiada balasan, yang mana dia tahu ada hubungan dengan tugas rasminya sebagai penjawat awam.

Sehubungan itu, tertuduh didakwa mengikut Seksyen 16(a)(A) Akta Suruhanjaya Pencegahan Rasuah Malaysia (SPRM) 2009 dan boleh dihukum mengikut Seksyen 24 akta sama dan Seksyen 165 Kanun Keseksaan.

Timbalan Pendakwa Raya SPRM, Khazrin Haffiz Khalil memaklumkan kepada mahkamah bahawa tertuduh pernah didakwa di Mahkamah Sesyen Ayer Keroh, Melaka dan berada dalam jaminan RM30,000.

Khazrin Haffiz kemudian mencadangkan kes dibawa ke Mahkamah Sesyen Ayer Keroh, Melaka dan dibicarakan dengan tujuh lagi pertuduhan dihadapi tertuduh di sana, selain mengguna pakai ikat jamin terdahulu.

Mahkamah bersetuju dengan cadangan itu dan menetapkan 5 November ini untuk sebutan semula kes di Mahkamah Sesyen Ayer Keroh, Melaka dan tertuduh dibenarkan ikat jamin dengan jaminan sedia ada.

10 Oktober 2018

5. Gudang kepak ayam haram : 50 peratus siasatan selesai - SPRM

KUCHING 10 Okt.- Suruhanjaya Pencegahan Rasuah Malaysia (SPRM) Sarawak sudah menyiapkan kira-kira 50 peratus siasatan mengenai sebuah gudang penyimpanan kepak ayam yang disyaki beroperasi secara haram di Miri sejak 30 tahun lalu, kata pengarahnya, Razim Mohd. Noor.

**RAZIM MOHD. NOOR**

"Siasatan masih belum 'complete' (lengkap), tetapi dah lebih 50 peratus kita dah siapkan. Beberapa faktor seperti yang terlibat tidak ada di Sarawak atau orang yang kita nak dapatkan maklumat lanjut tidak berada di sini menyebabkan siasatan masih berjalan," katanya.

Beliau berkata demikian kepada pemberita ketika ditemui pada Majlis Mesra Bersama Media di Pusat Informasi Islam (IIC) di sini hari ini.

Pada September lalu, sebuah akhbar nasional melaporkan gudang ayam itu beroperasi secara haram dengan menyeludup kepak ayam dari negara jiran yang mana penyembelihannya diragui dan dipasarkan di Sarawak serta Sabah.

Sementara itu, mengulas mengenai siasatan pembelian sebuah pesawat DA424M-NG Diamond bernilai RM35 juta oleh Jabatan Hutan Sarawak, Razim berkata siasatan kes tersebut masih lagi dilakukan.

"Saya tidak boleh komen sangat, tetapi apa yang saya boleh beritahu kes tersebut dalam siasatan SPRM Ibu Pejabat, ada pasukan telah pergi ke luar negara (negara jiran) untuk melakukan siasatan," katanya.

10 Oktober 2018

6. Rasuah: Jurubahasa Vietnam ditahan

JURUBAHASA sambilan yang dipercayai terlibat dalam kes rasuah melibatkan seorang pegawai kanan Agensi Penguatkuasaan Maritim Malaysia (Maritim Malaysia) berpangkat leftenant komander. dibawa ke Mahkamah Majistret Kuala Terengganu hari ini bagi mendapatkan perintah tahanan reman berhubung siasatan kes memberi rasuah.

KUALA TERENGGANU 10 Okt. - Seorang jurubahasa sambilan sambila wanita direman selama enam hari mulai hari ini bagi membantu siasatan kes memberi rasuah melibatkan seorang pegawai kanan Agensi Penguatkuasaan Maritim Malaysia (Maritim Malaysia) berpangkat leftenant komander.

Perintah reman ke atas jurubahasa terutama bagi nelayan Vietnam itu dikeluarkan oleh Penolong Pendaftar Mahkamah Majistret/Sesyen Kuala Terengganu, Wan Aziantie Wan Ab. Karim@Isa di sini hari ini.

Wanita berusia 46 tahun yang juga merupakan peniaga itu disiasat mengikut Seksyen 17 (a) Akta Suruhanjaya Pencegahan Rasuah (SPRM) 2009.

Suspek yang memakai jubah berwarna biru dan bertudung hitam ditahan kira-kira pukul 10.50 pagi semalam ketika hadir memberi keterangan di pejabat SPRM Terengganu.

Suspek dipercayai menjadi orang tengah kepada tekong nelayan Vietnam untuk menawarkan rasuah kepada pegawai pemerintah di sebuah kapal Maritim Malaysia sejak bulan Mac 2017.

Wang tersebut sebagai dorongan bagi melepaskan nelayan dan bot Vietnam yang ditahan oleh Maritim Malaysia kerana kesalahan menceroboh perairan negara.

Pada 28 Ogos lalu, pegawai pemerintah berkenaan ditahan reman di Mahkamah Majistret Kemaman bagi membantu siasatan kes rasuah dan pengubahan wang haram.

Sumber SPRM memberitahu, suspek sebelum ini sering dilantik APMM untuk menjadi jurubahasa bagi memudahkan urusan siasatan dan pertuduhan di mahkamah melibatkan nelayan negara berkenaan.

Kes disiasat mengikut Seksyen 17(a) Akta Suruhanjaya Pencegahan Rasuah Malaysia 2009 yang memperuntukkan hukuman penjara sehingga 20 tahun dan denda RM10,000 atau lima kali ganda nilai suapan mengikut mana yang tinggi jika sabit kesalahan.

11 Oktober 2018

7. Bekas pengurus didakwa pecah amanah baja subsidi



AMIRUL Redzuan Sharudin dituduh pecah amanah pembahagian baja subsidi dihadapkan di Mahkamah Sesyen Ipoh, hari ini

IPOH 11 Okt. - Seorang bekas pengurus subsidi dihadapkan ke Mahkamah Sesyen di sini hari ini atas tiga pertuduhan pecah amanah melibatkan pembahagian baja subsidi bernilai RM80,909 empat tahun lalu.

Tertuduh, Amirul Redzuan Sharudin, 36, bagaimanapun mengaku tidak bersalah dan minta dibicarakan selepas kesemua pertuduhan terhadapnya itu dibacakan di hadapan Hakim S. Indra Nehru.

Mengikut ketiga-tiga pertuduhan, tertuduh yang diwakili peguam, Norlida Ishak dari Yayasan Bantuan Guaman Kebangsaan (YBGK) didakwa melakukan pecah amanah dengan tidak mengedar baja subsidi hak Kerajaan Malaysia kepada tiga pengusaha sawah berlainan masing-masing bernilai RM62,046, RM13,567 dan RM5,296.

Tertuduh didakwa tidak mengagihkan semua baja tersebut masing-masing 1,068 beg baja sebatian, baja urea (417) dan 650 beg baja NPK bagi musim 1/2014 dan 2/2014 kepada ketiga-tiga petani tersebut antara Februari hingga Disember 2014 di pejabatnya di Pertubuhan Peladang Kawasan (PPK) Sungai Siput Utara dekat sini.

Pegawai Pendakwa Suruhanjaya Pencegahan Rasuah Malaysia (SPRM), K. Kumuthambal mengemukakan pertuduhan itu terhadap Amirul Redzuan mengikut Seksyen 409 Kanun Keseksaan.

Seksyen tersebut memperuntukkan hukuman penjara sehingga 20 tahun dan sebat dan boleh juga dikenakan denda jika sabit kesalahan.

12 Oktober 2018

8. Ahmad Zahid beri keterangan SPRM kali ke-5

PUTRAJAYA 12 Okt.- Presiden UMNO, Datuk Seri Dr. Ahmad Zahid Hamidi hari ini hadir sekali lagi bagi memberikan keterangan kepada Suruhanjaya Pencegahan Rasuah Malaysia (SPRM) untuk kali kelima.

Ahmad Zahid yang mengenakan baju berwarna putih tiba di ibu pejabat SPRM di sini dengan menaiki kenderaan jenis Lexus berwarna putih pada pukul 9.18 pagi.

Menurut sumber, Ahli Parlimen Bagan Datuk tersebut dipercayai memberi keterangan kepada SPRM berhubung dakwaan penyelewengan dana membabitkan yayasan milik keluarganya iaitu Yayasan Akal Budi.

Semalam dan kelmarin, Ahmad Zahid telah dipanggil memberi keterangan masing-masing selama lapan dan sembilan jam selain untuk kali pertama dan kedua pada 2 dan 3 Julai lalu.

13 Oktober 2018

9. Ahmad Zahid perjelas tujuh perkara

Sedia ke SPRM lagi sekiranya maklumat tidak mencukupi



AHMAD ZAHID HAMIDI dengan bersongkok berhenti berehat bagi menunaikan solat jumaat selepas hadir sekali lagi memberikan keterangan kepada Suruhanjaya Pencegahan Rasuah Malaysia (SPRM) buat kali kelima di sini hari ini.

PUTRAJAYA 12 Okt. - Presiden UMNO, Datuk Seri Dr. Ahmad Zahid Hamidi telah menjelaskan lebih terperinci berhubung tujuh perkara yang menjadi skop siasatan Suruhanjaya Pencegahan Rasuah Malaysia (SPRM).

Walau bagaimanapun, Ahmad Zahid yang merupakan Ahli Parlimen Bagan Datuk enggan mengulas lanjut tentang tujuh perkara tersebut.

Menurutnya, hari ini merupakan kali terakhir beliau dipanggil memberikan keterangan kepada SPRM setelah lima kali berbuat demikian.

"Saya bersedia datang semula untuk memberi keterangan kepada SPRM sekiranya maklumat itu tidak memenuhi keperluan siasatan.

"Ini tindakan yang tidak boleh diketepikan bagi orang awam yang dipanggil untuk memberikan keterangan kepada SPRM," katanya dalam sidang akhbar sejurus selesai memberikan keterangan kepada SPRM di sini hari ini.

Bekas Timbalan Perdana Menteri itu turut mengucapkan terima kasih kepada SPRM khususnya Ketua Pesuruhjaya, Datuk Seri Mohd. Shukri Abdull dan pegawai kanan yang memberi kerjasama penuh profesional.

Terdahulu, beliau memberikan keterangan selama lebih tujuh jam kepada SPRM.

Semalam dan kelmarin, Ahmad Zahid telah dipanggil memberi keterangan masing-masing selama lapan dan sembilan jam selain untuk kali pertama dan kedua pada 2 dan 3 Julai lalu.

Beliau dipercayai memberi keterangan kepada SPRM berhubung dakwaan penyelewengan dana membabitkan yayasan milik keluarganya iaitu Yayasan Akal Budi.

Selain Ahmad Zahid, turut dipanggil memberikan keterangan ialah anak sulungnya, Datuk Nurulhidayah dan adiknya, Datuk Seri Mohamad Nasae Ahmad Tarmizi @ Hamidi.

14 Oktober 2018

10. Rasuah: Inspektor wanita pula ditahan

KUALA LUMPUR 14 Okt. - Seorang polis wanita berpangkat Inspektor ditahan Suruhanjaya Pencegahan Rasuah Malaysia (SPRM) bagi membantu siasatan kes meminta dan menerima suapan sebanyak RM40,000 daripada pemilik kedai nombor ekor haram, kelmarin.

Wanita berusia 38 tahun itu, ditahan kira-kira pukul 11.42 malam di Ibu Pejabat SPRM di Putrajaya dekat sini selepas hadir memberikan keterangan.

Penahanan Inspektor tersebut susulan penangkapan seorang ketua polis daerah di Sarawak berpangkat Deputi Superintenden sehari sebelum itu.

Menurut sumber, suspek disyaki bersubahat dengan ketua polis daerah tersebut.

"Ketua polis daerah terbabit telah meminta pemilik kedai nombor ekor haram memasukkan wang ke dalam akaun suspek dan wanita itu kemudiannya memasukkan wang tersebut ke dalam akaun milik ketua polis daerah itu," katanya, di sini semalam.

Jelas sumber, suspek yang bertugas di Selangor telah dibebaskan dengan jaminan RM10,000 beserta seorang penjamin semalam.

Kes tersebut disiasat mengikut Seksyen 17(a) Akta SPRM 2009.

17 Oktober 2018

11. IPIC: Najib sekali lagi ke SPRM



NAJIB TUN RAZAK

PUTRAJAYA 18 Okt. - Bekas Perdana Menteri, Datuk Seri Najib Tun Razak hari ini dipanggil sekali lagi ke Suruhanjaya Pencegahan Rasuah Malaysia (SPRM) bagi membantu siasatan berkaitan pembayaran hutang dana pelaburan 1Malaysia Development Berhad (1MDB) kepada International Petroleum Investment Co. (IPIC).


Menurut sumber, beliau tiba di sini melalui pintu belakang ibu pejabat SPRM pada pukul 10 pagi.

Kelmarin, Ahli Parlimen Pekan itu juga dipanggil membabitkan kes sama.

Sebelum ini, beliau dipanggil SPRM untuk membantu siasatan kes tersebut berikutan terdapat penemuan baharu dalam siasatan 1MDB yang masih aktif dijalankan.

17 Oktober 2018

12. Faedah 1MDB yang perlu dibayar



LIM Guan Eng menunjukkan jadual pembayaran kadar faedah 1MDB semasa hadir pada Mesyuarat Kedua Penggal Pertama Majlis Parlimen ke-14 di Bangunan Parlimen hari ini.

KUALA LUMPUR 18 Okt. - Sejumlah RM1.68 bilion faedah pinjaman 1Malaysia Development Berhad (1MDB) perlu dibayar tahun ini.

Menurut Menteri Kewangan, Lim Guan Eng, jumlah tersebut termasuk kadar bayaran faedah Projek Loji Tenaga Kuala Langat 1MDB sebanyak RM208.8 juta yang telah dibayar hari ini.

Jelas beliau, dua lagi pembayaran akan dibuat iaitu pada 11 November berjumlah RM217.51 juta manakala di bawah Sukuk Islamik Jangka Sederhana sejumlah RM143.75 juta pada 29 November ini.

"Kerajaan Pakatan Harapan (PH) akan terus membuat pembayaran seperti yang ditetapkan dalam kontrak kerajaan lama.

"Saya selalu tegaskan Malaysia akan mengotakan komitment obligasi yang kita buat di peringkat antarabangsa. Malaysia tidak akan berasa dalam keadaan gagal bayar hutang (default). Kita akan membuat pembayaran," katanya kepada pemberita di lobi Parlimen di sini, hari ini.

Jelas Guan Eng yang juga Ahli Parlimen Bagan, pihaknya akan terus mengambil langkah fiskal bagi mengatasi masalah ini.

Kata beliau, kesan buruk jika Malaysia berada dalam status gagal bayar hutang adalah menjaskan penarafan atau rating di peringkat antarabangsa.

21 Oktober 2018

13. Kakitangan Jabatan Perhutanan mengaku tidak bersalah

Kakitangan Jabatan Perhutanan dihadapkan ke Mahkamah Sesyen Kuala Terengganu hari ini atas tuduhan meminta dan menerima rasuah

KUALA TERENGGANU 21 Okt. - Seorang kakitangan Jabatan Perhutanan mengaku tidak bersalah di Mahkamah Sesyen di sini hari ini atas pertuduhan menerima suapan RM500, lima tahun lalu.

Suhaimee Wan Mohamad, 35, yang merupakan pembantu awam di Pejabat Hutan Daerah Terengganu Utara membuat pengakuan itu selepas pertuduhan dibacakan di hadapan Hakim Rofiah Mohamad.

Tertuduh didakwa memperoleh wang suapan RM500 daripada pemilik sebuah syarikat sebagai balasan supaya kerja-kerja pembalakan di kawasan Hutan Simpan Hulu Terengganu yang dilakukan oleh syarikat itu tidak diganggu.

Mengikut kertas pertuduhan, wang tersebut didakwa dimasukkan oleh kerani syarikat ke dalam akaun Affin Bank milik tertuduh.

Perbuatan itu didakwa dilakukan tertuduh di Affin Bank Cawangan Kuala Terengganu, 63, Jalan Sultan Ismail kira-kira pukul 1.38 petang, pada 23 Mei 2013.

Pendakwaan dikendalikan Timbalan Pendakwa Raya Suruhanjaya Pencegahan Rasuah Malaysia (SPRM), Shahidah Muslimah Roslan mengikut Seksyen 165 Kanun Keseksaan.

Hakim membenarkan tertuduh diikat jamin RM3,000 dengan seorang penjamin dan menetapkan 12 November depan sebagai sebutan semula kes berkenaan.

22 Oktober 2018

14. SPRM tahan 15 pegawai belia, sukan

JOHOR BAHRU 22 Okt. - Suruhanjaya Pencegahan Rasuah Malaysia (SPRM) Johor menahan 15 pegawai belia dan sukan untuk membantu siasatan berhubung tuntutan palsu berkaitan Program Liga Sukan di negeri ini melibatkan jumlah RM90,000 pada 2015.

Kesemuanya yang merupakan pegawai di pejabat belia dan sukan di lapan daerah berusia antara 30 hingga 50 tahun ditahan kira-kira pukul 12 tengah hari tadi di Pejabat SPMR Johor di sini.

Suspek yang terdiri daripada lelaki dan wanita ditahan untuk siasatan penganjuran program tersebut di Ledang, Mersing, Muar, Batu Pahat, Kulai, Pontian, Kluang dan Kota Tinggi sedangkan program itu tidak dianjurkan.

Siasatan SPM mendapati mereka bersubahat dengan kontraktor-kontraktor dalam melakukan tuntutan palsu itu.

Kes disiasat di bawah Seksyen 18 Akta SPM 2009, jika sabit kesalahan boleh dikenakan hukuman denda lima kali nilai suapan atau RM10,000 untuk yang tinggi dan penjara tidak lebih 20 tahun.

Pengarah SPM Johor, Datuk Azmi Alias ketika dihubungi mengesahkan tangkapan tersebut dan memaklumkan kesemua suspek akan dihadapkan ke mahkamah esok untuk permohonan reman bagi membantu siasatan.

15. SPRM tidak berkompromi pihak terlibat rasuah dalam pencerobohan Cameron Highlands**Datuk Seri Azam Baki**

PUTRAJAYA 22 Okt.- Suruhanjaya Pencegahan Rasuah Malaysia (SPRM) tidak akan berkompromi dengan mana-mana pihak yang terlibat dalam pencerobohan tanah di Cameron Highlands menerusi kegiatan rasuah atau salah guna kuasa hingga menyebabkan isu itu berulang lagi.

Timbalan Ketua Pesuruhjaya (Operasi) SPRM, Datuk Seri Azam Baki menegaskan, pihaknya memandang serius berhubung dakwaan bahawa kononnya kegiatan rasuah semakin berleluasa hingga mengakibatkan pencerobohan tanah dan penerokaan kebun haram di tanah tinggi itu terus berulang seperti dilaporkan oleh Mingguan Malaysia semalam.

Ujarnya, dalam hal berkaitan, SPRM berharap pihak berkuasa bertanggungjawab menguatkuasakan undang-undang agar segera mengambil tindakan sepetimana keputusan Pasukan Petugas Khas Op Gading yang dipengerusikan oleh Tan Sri Muhyiddin Yassin sebelum ini.

"Kejadian penerokaan kebun haram yang berulang tidak sepatutnya timbul dan SPRM memandang serius sekiranya perkara itu ada kaitan dengan isu rasuah atau salah guna kuasa.

"Tindakan undang-undang akan diambil di bawah bidang kuasa suruhanjaya ini bagi menangani isu rasuah tersebut," katanya dalam satu kenyataan di sini hari ini.

Azam menambah, berdasarkan statistik, sejak 2015 sehingga kini, SPRM telah membuat tangkapan terhadap 23 individu dan mendapat izin mendakwa terhadap 11 individu atas pelbagai kesalahan mengikut Akta SPRM 2009 berkaitan isu tersebut.

Katanya, SPRM meminta orang ramai yang mempunyai maklumat berasas mengenai kegiatan rasuah membabitkan kes-kes pencerobohan tanah dan penerokaan kebun haram di Cameron Highlands untuk melaporkan terus kepada pejabat SPRM terdekat.

23 Oktober 2018

16. Ahli Majlis Daerah antara ditahan SPRM

KUALA LUMPUR 22 Okt. - Ahli Majlis Daerah antara 23 individu yang ditahan Suruhanjaya Pencegahan Rasuah Malaysia (SPRM) sejak 2015 sehingga kini kerana terlibat dalam kegiatan rasuah serta salah guna kuasa di Cameron Highlands, Pahang.

Turut ditahan ialah akauntan pejabat daerah, kontraktor, pekebun dan pendatang asing tanpa izin (PATI) di tanah tinggi terbabit.

Timbalan Ketua Pesuruhjaya (Operasi) SPRM, Datuk Seri Azam Baki berkata, susulan penahanan terbabit, sepanjang tempoh itu juga sebanyak 11 individu telah didakwa atas pelbagai kesalahan mengikut Akta SPRM 2009 berkaitan isu tersebut. Ujar beliau, SPRM sama sekali tidak berkompromi dan akan mengambil tindakan sekiranya terdapat dakwaan mengenai pencerobohan tanah serta penerokaan kebun haram di kawasan tersebut sehingga mengakibatkan kejadian tanah runtuh berulang.

**AZAM BAKI**

"Pihak berkuasa yang bertanggungjawab menguatkusakan undang-undang di tanah tinggi itu perlu segera mengambil tindakan seperitimana keputusan Pasukan Petugas Khas Op Gading dipengerusikan oleh Menteri Dalam Negeri, Tan Sri Muhyiddin Mohd. Yassin sebelum ini.

"Sehubungan itu, SPRM meminta orang ramai yang mempunyai maklumat berdas mengenai kegiatan rasuah membabitkan kes pencerobohan tanah dan penerokaan kebun haram di Cameron Highlands untuk melaporkan terus kepada pejabat SPRM terdekat," katanya di sini hari ini.

Semalam, akhbar *Mingguan Malaysia* dalam laporannya mendedahkan mengenai penerokaan tanah di Cameron Highlands kini semakin parah dan berada pada tahap membimbangkan.

Laporan itu mendedahkan pencerobohan tanah berlaku disebabkan gejala rasuah dalam kalangan anggota agensi berkaitan di bawah kawasan pelancongan berkenaan.

23 Oktober 2018

17. 12 pegawai belia dan sukan direman 5 hari



Sebahagian daripada pegawai belia dan sukan negeri diiringi ke Mahkamah Majistret bagi mendapatkan permohonan reman, hari ini.

JOHOR BAHRU 23 Okt. - Mahkamah Majistret di sini pagi tadi membenarkan tahanan reman selama lima hari ke atas 12 pegawai belia dan sukan bagi membantu siasatan bersubahat membuat tuntutan palsu melebihi RM90,000, tiga tahun lalu.

Majistret, Siti Hajar Ali membenarkan tahanan reman bermula hari ini terhadap kesemua suspek selepas permohonan dikemukakan oleh Pegawai Pendakwa Suruhanjaya Pencegahan Rasuah Malaysia (SPRM), Mohamad Anis Redza Muhamad Anuar.

Perintah tahanan reman ke atas mereka yang berusia dalam lingkungan 30-an dan 50-an bagi membolehkan siasatan mengikut Seksyen 18 Akta SPRM 2009 kerana bersubahat.

Jika sabit kesalahan, mereka boleh dikenakan hukuman denda lima kali nilai suapan atau RM10,000 atau mana-mana yang tinggi dan penjara tidak melebihi 20 tahun.

Semalam, kesemua suspek ditahan ketika hadir memberi keterangan di Pejabat SPRM negeri kira-kira pukul 12 tengah hari

23 Oktober 2018

18. Najib dipanggil semula, Irwan Siregar mungkin ditahan esok

KUALA LUMPUR 23 Okt.- Bekas Perdana Menteri, Datuk Seri Najib Razak sekali lagi akan dipanggil Suruhanjaya Pencegahan Rasuah Malaysia (SPRM) esok bagi siasatan lanjut berkaitan firma pelaburan Abu Dhabi iaitu International Petroleum Investment Company (IPIC).

Selain beliau, turut akan dipanggil SPRM iaitu bekas Ketua Setiausaha Perbendaharaan, Tan Sri Irwan Serigar Abdullah.

Menurut sumber, kedua-dua mereka akan hadir ke Ibu pejabat SPRM, Putrajaya kira-kira pukul 2 petang.

"Mereka telah dimaklumkan mengenai perkara ini dan dijangka SPRM akan menahan Irwan Serigar sebelum melakukan pendakwaan di Mahkamah Khamis ini.

"Namun, bekas Perdana Menteri itu mungkin tidak akan ditahan dan akan dibebaskan sebaik sahaja keterangan diambil," katanya di sini hari ini.

Tambah sumber lagi, Ahli Parlimen Pekan itu berkemungkinan akan menghadapi sekurang-kurangnya enam pertuduhan membabitkan kes yang sedang disiasat.

"Bagaimanapun, jumlah pertuduhan yang bakal dihadapkan terhadap Irwan Serigar masih belum dipastikan," jelasnya.

Pada 16 Oktober lalu, akhbar melaporkan bekas Perdana Menteri, Datuk Seri Najib Tun Razak telah dipanggil ke SPRM bagi membantu siasatan berkaitan pembayaran hutang dana pelaburan 1Malaysia Development Berhad (1MDB) kepada International Petroleum Investment Co. (IPIC).

Laporan terbabit turut mendedahkan beliau dipanggil untuk membantu siasatan kes tersebut berikutan terdapat penemuan baharu dalam siasatan 1MDB yang masih aktif dijalankan.

Selain itu, Najib juga dijangka menghadapi lebih banyak pertuduhan kes berkaitan 1Malaysia Development Berhad (1MDB) memandangkan SPRM telah membuka beberapa lagi kertas siasatan terhadap beliau rentetan siasatan kes tersebut

29 Oktober 2018

19. SPRM tahan pengarah IPTA

PULAU PINANG 29 Okt. - Seorang pengarah sebuah jabatan institusi pengajian tinggi awam (IPTA) di sini akan didakwa di Mahkamah Butterworth di sini, esok atas tuduhan salah guna kuasa membabitkan nilai lebih RM159,000.

Menurut sumber, pengarah berusia 53 tahun itu yang juga pensyarah di IPTA terkemuka di sini, ditahan pada pukul 11.35 pagi ini ketika hadir memberi keterangan di Pejabat SPRM di sini.

Tambahnya, suspek disyaki menyalahgunakan kuasa dan kedudukannya dengan meluluskan peruntukan bagi sebuah syarikat milik adiknya untuk pembelian pelbagai barang bagi jabatan tersebut membabitkan nilai melebihi RM159,000 antara September 2011 hingga Mei 2012.

Pengarah SPRM negeri, Datuk Wan Ramli Wan Abdullah mengesahkan perkara tersebut dan memaklumkan kes tersebut akan disiasat Seksyen 23 Akta SPRM 2009.

29 Oktober 2018

20. Pengarah jabatan IPTA ditahan SPRM kes rasuah lebih RM159,000

PULAU PINANG 29 Okt. - Seorang Pengarah jabatan institusi pengajian tinggi awam (IPTA) di sini, ditahan Suruhanjaya Pencegahan Rasuah Malaysia (SPRM) hari ini bagi membantu siasatan kes salah guna kuasa membabitkan nilai lebih RM159,000.

Menurut sumber, Pengarah berusia 53 tahun itu yang juga seorang Profesor ditahan pukul 11.35 pagi ini ketika hadir memberi keterangan di Pejabat SPRM di sini.

Tambahnya, suspek disyaki menyalahgunakan kuasa dan kedudukannya dengan meluluskan peruntukan bagi sebuah syarikat milik adiknya untuk pembelian pelbagai barang bagi jabatan tersebut membabitkan nilai melebihi RM159,000 antara September 2011 hingga Mei 2012.

Ujarnya, kes itu disiasat mengikut Seksyen 23 Akta SPRM 2009.

Sementara itu, Pengarah SPRM negeri, Datuk Wan Ramli Wan Abdullah mengesahkan perkara tersebut dan memaklumkan suspek akan didakwa di Mahkamah Butterworth, di sini esok.

21. Pegawai Imigresen didakwa rasuah

TERTUDUH, seorang pegawai imigresen, Mohd. Nazari Mohamed, 48 dihadapkan ke mahkamah Sesyen di sini sebentar tadi atas pertuduhan meminta dan menerima suapan

JOHOR BAHRU 30 Okt. - Seorang pegawai Imigresen negeri gred KP17 dihadapkan ke Mahkamah Sesyen di sini hari ini atas dua pertuduhan meminta dan menerima rasuah daripada pengusaha feri, enam tahun lalu.

Tertuduh, Mohd. Nazari Mohamed, 48, mengaku tidak bersalah selepas pertuduhan dibacakan jurubahasa mahkamah di hadapan Hakim Kamarudin Kamsun.

Bagi pertuduhan pertama, tertuduh didakwa meminta suapan sebanyak RM70,000 daripada pemilik syarikat pengangkutan feri Panti Bistari Travel & Tour Sdn. Bhd. antara pukul 12.50 tengah hari hingga 1 petang pada 28 Januari 2012.

Mohd. Nazari didakwa melakukan perbuatan itu kononnya untuk tidak mengganggu perniagaan syarikat terbabit dan melancarkan kemasukan penumpang feri yang diuruskan dari Batam, Indonesia ke Tanjung Belungkor, Kota Tinggi dekat sini.

Dia didakwa melakukan perbuatan itu di Pejabat Suruhanjaya Pencegahan Rasuah Malaysia (SPRM) Kluang, Jalan Dato' Kapten Ahmad, Kluang.

Bagi pertuduhan kedua, tertuduh didakwa menerima suapan sebanyak RM23,000 daripada pemilik feri terbabit sebagai dorongan untuk tidak mengambil tindakan sama terhadap perniagaan feri tersebut.

Perbuatan kedua didakwa dilakukan tertuduh di alamat Nombor 30, Jalan SS8/10, Taman Sri Saujana, Kota Tinggi antara pukul 10.20 malam hingga 10.30 malam pada 31 Januari 2012.

30 Oktober 2018

22. Didakwa salah guna kuasa

BADARUDDIN MOHAMED (kanan) didakwa menyalahgunakan kuasa di Mahkamah Butterworth, Pulau Pinang, semalam

BUTTERWORTH 30 Okt. -Seorang bekas Pengarah Pejabat Komunikasi Strategik Universiti Sains Malaysia (USM) mengaku tidak bersalah di Mahkamah Sesyen di sini hari ini atas sembilan pertuduhan salah guna kuasa melibatkan jumlah keseluruhan RM160,163 tujuh tahun lalu.

Badaruddin Mohamed, 53, yang kini bertugas sebagai pensyarah di Pusat Pengajian Perumahan, Bangunan dan Perancangan USM membuat pengakuan itu selepas pertuduhan selesai dibacakan kepadanya di hadapan Hakim Nizam Zakaria.

Mengikut pertuduhan, Badaruddin didakwa menggunakan jawatannya untuk mendapatkan suapan bagi adik kandungnya apabila meluluskan syarikat MK Usahaniaga (M) Sdn. Bhd. milik Mustafa Kamal Mohamed dalam pembekalan pelbagai jenis peralatan.

Antara peralatan yang dibekalkan adalah alat biometrik, cenderahati, mesin pengimbas, walkie talkie, kamera digital, tripod, kamera Gopro dan sistem audio.

Kesemua kesalahan itu didakwa dilakukannya yang juga Ketua Kluster Penyelidikan Pelancongan Lestari USM antara 5 September 2011 hingga 23 November 2012.

Pertuduhan terhadapnya dikemukakan oleh Timbalan Pendakwa Raya daripada Suruhanjaya Pencegahan Rasuah Malaysia (SPRM), Amer Abu Bakar Abdullah mengikut Subseksyen 23(1) Akta SPMR 2009 dan boleh dihukum di bawah subseksyen 24(1) akta sama.

Subseksyen tersebut memperuntukkan hukuman penjara maksimum sehingga 20 tahun dan denda tidak kurang lima kali ganda jumlah atau nilai suapan atau RM10,000 mengikut mana yang lebih tinggi.

Pihak pendakwaan menawarkan jaminan RM10,000 bagi setiap pertuduhan, namun dibantah oleh peguam Rahmatullah Baharudeen yang mewakili Badaruddin atas alasan anak guamnya menyara isteri serta empat anak dengan tiga daripada mereka masih bersekolah dan seorang menuntut di universiti.

Mahkamah kemudian membenarkan Badaruddin dibebaskan dengan jaminan RM24,500 berserta empat penjamin dan pasportnya perlu diserahkan kepada mahkamah sehingga kes selesai, selain menetapkan sebutan kes pada 29 November ini bagi serahan dokumen

23. Itu bukan masa saya - Hasan

KUALA LUMPUR 30 Okt. - Datuk Seri Hasan Arifin menjelaskan dakwaan kononnya laporan Jabatan Audit Negara berkenaan 1Malaysia Development Berhad (1MDB) sebelum ini telah dipindah atas arahan pihak tertentu, tidak berlaku ketika beliau menjadi Pengurus Jawatankuasa Kira-Kira Wang Negara (PAC).

**Datuk Seri Hasan Arifin**

Hasan bagaimanapun berkata, dakwaan Timbalan Pengurus PAC, Wong Kah Woh semalam ketika membahaskan usul Kajian Separuh Penggal Rancangan Malaysia Ke- 11 (RMK-11) itu kurang jelas.

Justeru, beliau meminta Pengurus PAC, Datuk Seri Dr. Ronald Kiandee untuk memberi penjelasan secara terperinci berhubung dakwaan tersebut.

"Itu bukan masa saya. Sebenarnya, saya pun tidak tahu apa yang dimaksudkan oleh Timbalan Pengurus PAC. Dakwaan itu tidak dijelaskan dengan betul.

"Setahu saya, apa yang dibentangkan kepada kita, itulah yang kita dapat daripada Ketua Audit Negara," katanya ketika ditemui pemberita di lobi Parlimen, hari ini.

Semalam, Kah Woh mendakwa, isu 1MDB begitu serius bukan sekadar PAC sebelum ini gagal membuka semula siasatan malah berlaku salah guna kuasa yang mana laporan asal Ketua Audit Negara dipindah atas arahan sesetengah pihak.

Kah Woh juga mendakwa beberapa agensi kerajaan termasuk Suruhanjaya Pencegahan Rasuah Malaysia (SPRM), Pejabat Peguam Negara dan Bank Negara turut 'dilumpuhkan' berikutan isu berkenaan sebelum ini.

30 Oktober 2018

24. SPRM perlu siasat dakwaan MyPPP terima RM36 juta wang 1MDB

Jurucakap Parti Progresif Penduduk Malaysia (MyPPP), Datuk Dr. Loga Bala Mohan membuat laporan kepada Suruhanjaya Pencegahan Rasuah Malaysia (SPRM) berhubung dakwaan Tan Sri M. Kayveas bahawa parti itu menerima RM36 juta daripada dana 1Malaysia Development Berhad (1MDB) di ibu pejabat SPRM hari ini

PUTRAJAYA 30 Okt.- Parti Progresif Penduduk Malaysia (MyPPP) menggesa Suruhanjaya Pencegahan Rasuah Malaysia (SPRM) menyiasat dakwaan Tan Sri M. Kayveas bahawa sebanyak RM36 juta diberikan kepada parti itu tahun ini.

Jurucakap MyPPP, Datuk Dr. Loga Bala Mohan berkata, siasatan segera perlu dilakukan kerana Kayveas juga mendakwa wang yang diterima MyPPP itu mempunyai kaitan dengan dana 1Malaysia Development Berhad (1MDB).

Beliau berkata, pihaknya juga mendesak agar Kayveas mendedahkan nama enam bekas ahli yang dikatakan menerima wang berkenaan dan jumlah sebenar yang diterima mereka kerana semua ahli parti berhak tahu mengenai perkara itu.

"Saya bersama kepimpinan tertinggi parti hari ini membuat laporan kepada SPRM berhubung kenyataan Kayveas yang dilaporkan sebuah portal mengenai dakwaan MyPPP menerima dana sebanyak RM36 juta yang berkait dengan 1MDB.

"Siasatan secara menyeluruh perlu dilakukan bagi membolehkan perkara sebenar dibongkarkan dan kebetulan pula SPRM juga sedang menyiasat kes 1MDB ketika ini," katanya ketika ditemui pemberita di sini hari ini.

Ketika ini MyPPP terpecah kepada dua kepimpinan iaitu di bawah Presiden, Datuk Seri Maglin D'Cruz yang dipilih selepas mesyuarat agung tahunan (AGM) pada Mei lalu selain Kayveas yang mengaku bahawa beliau masih presiden yang sah.